



Mauritius PM-i India semdang;
PM Modi den ajuruteptsü

Nepal Ato Kilonser K.P
Sharma Oli-i mapa toktsüogo

CP Radhakrishnan-i India nung 15 buba Vice President inyaktsü

New Delhi, September 9, 2025 (Agencies): Maharashtra Governor aser National Democratic Alliance (NDA) candidate CP Radhakrishnan-i tanü Vice President election nung takok nguogo.

Tanü election nung Radhakrishnan-i votes 452 aser INDIA bloc joint candidate B Sudershan Reddy-i votes 300 ngua liasü.

Tanep 10:00 ako nungi election tenzük aser nikongdang 5:00 ako nung tembang.

Tan Vice Presidential election nung Radhakrishnan ya Bharatiya Janata Party (BJP), Telugu Desam Party (TDP), Janata Dal United (JDU), Shiv Sena, Nationalist Congress Party (NCP), Asom Gana Parishad (AGP), Lok Janshakti Party (Ram Vilas), Rashtriya Lok Dal (RLD), Janata Dal Secular (JDS) aser All India Anna Dravida Munnetra Kazhagam (AIADMK) teloktemi nungit.

Maneni, Jagan Mohan Reddy'er YSRCP-ia Radhakrishnan nem votes enoktsü.

Külen, Congress, Dravida Munnetra Kazhagam (DMK), Samajwadi Party (SP), Trinamool Congress (TMC), Jharkhand Mukti Morcha (JMM), Aam Aadmi Party (AAP), Rashtriya Janata Dal (RJD), Shiv Sena (UBT), Nationalist Congress Party (SP) aser Left party temi Reddy pusema nungit.

Tanü election nung Biju Janata Dal (BJD), Bharat Rashtra Samithi (BRS) aser Shiromani Akali Dal (SAD) MP temi shilem magi.

Tanep Prime Minister

Narendra Modi-i Parliament complex nung Room Number 10 polling booth nung vote enokja liasü. Idangji Union Minister tem-Kiren Rijiju, Arjun Ram Meghwal, Jitendra Singh aser L Murugan nungeri pa meina ao.

Taoba Vice President Jagdeep Dhankhar-i July 21 nü ajungbena sodi agiba ajanga vice presidential elections agitsüsa aküm.

Dhankhar-i temang manemba nung ajemdaker sodi agi saka NDA-i aniba Centre sorkar den pa mepetmesü kar aliba ajanga asütsü ta jembir.

India nung 15 buba Vice President CP Radhakrishnan ya May 4, 1957 nü Tirupur, Tamil Nadu nung aso. 1973 nung pa arishi küm 13 asüidang Rashtriya Swayamsevak Sangh (RSS) nung aden aser iba sülen küm ishika lir politics nung ajemok.

Radhakrishnan-i mezüingbo Janata Party nung aden aser iba sülen BJP züngsem aküm.

1998 nung Radhakrishnan-i parliamentary wadang nung ajemoka liasü. Iba küm pa Coimbatore constituency nungi BJP candidate ka ama takok angu aser ano 199 nunga kasa menden nungi takok nguteta liasü. Item takok ya Coimbatore bombings sülen anguba liasü aser idangji iba tesem nung BJP tera ayang.

2004 nungi 2007 tashi pai Tamil Nadu BJP President inyak aser iba mapang pai anogo 93 rath yatra ka ayonga agia liasü.

2004 nung Dravida Munnetra Kazhagam (DMK)-i BJP den tesentaktep pilaba sülen Radhakrishnan-i Tamil Nadu nung NDA tesentaktep akangshiba nung tongti shilem agia liasü.

Ao Senden-i Mangmetong-Doyang PMGSY lenmang semdang

Mokokchung, 09th Sept: Lotha Hoho den külemi 9th September 2025 nü, Ao Senden-i tang teyangludak PMGSY kübok Mangmetong – Doyang lenmang repranga jajaogo. Iba lenmang ya M/s LPSS Infra, Kohima-i 21st March, 2024 nung agizük aser ibai ita 18 (aji tan ita abenar) nung renemtsü asoshi work order nung shia lir, saka iba mapa noklang shilem nung 9-10% dang inyaka lir. Iba lenmang ya kilometer 36.450 lir aser iba mapatong jenangji 4654.05 lakh lir.

Iba lenmang repranga jajaba mapang Ao Senden aser Lotha Hoho ketdangsürtem den Ongpangkong Mungdang (OM), Ongpangkong Kaketshir Mungdang (OKM), Mangmetong council, Longkhum council, Pangti, Okotso yim nungi yimsüsür, osangzülurtem,

department nungi Er. R. Tekayanger Walling (PIU II, SRRDA Mokokchung, PWD Road & Bridges) aser LPSS Infra tenüng nung mapa agizüksang Contractor, Ghunavi Aye densema liasü.

Lenmangtem repranga jajar külen, Pangti yimdak senden ka akadang Ao Senden tir, Marsanen Imsong-i Naga lima ya tenem teimba, yangi train, tayimtsü, rong service-tem bulua mali, asenok asoshi senzusenbongbaji gari lenmang dang, aji oda, nüngdak ajak gari lenmang ajanga dang inyaktsüsa akümer. Anungji, asen lima gari lenmang junga alitsüba kanga tongtibang aser tanüa asenok yangi senteptsüsa akümiba ya tanga kecha masü saka gari lenmangjungdaksünüba agi lir, ta metetdaksü.

(Maneni tapak 2 nung...)

Nagaland RMSA-2016 tesayurtemi anogo anabuba lungkak ait

Kohima, September 9, 2025 (TYO): Nagaland RMSA-2016 Teachers Association (NRMSATA-2016) tesayurtemi tanü agi anogo anabuba lungkak aitogo.

Hombar nungi tenzükba sentong nung RMSA-2016 tesayurtem aikati shilem agir aser parnok rongnung kinü tanur anir tetsütemia dena lir. RMSA-2016 tesayurtem ya sorkar school 133 nungi lir.

Parnoki sorkar dang service regularization asütsü, itasen magütsü aliba agütsütsü, appointment letters tejangja

agütsütsü aser parnok service osang tejangja metetdaksütsü akhangar.

High Court-i tetuyuba agüjaka Supreme Court nung review petition ka benoka lir ta shia state sorkari parnok senzuka yutsür ta tesayurtemi ashir.

N R M S A T A - 2 0 1 6 tesayurtemi lungkak aitba nung civil society groups, kaketshir teloktem aser tanga teloktemia pusema nungiter. Sorkar nungi telangzüba tajung mengura parnoki lumia lungkak aitba tenzüktsü ta metetdaksüogo.

"Education department-i Hombarnü onok dangi review petition ka benoka lir anungji lungkak aittsü athitsü mepishia zülüogo" ta NRMSATA-2016 president Imlitemjen Imchen-i ashi.

"Ajisüaka Association-i iba temepishiba magizüker aser onoki akhangba ama telangzüba mangu tashi mener lungkak aittsü" ta pai ashi.

Tesayurtemi lungkak aitba ajanga school tem nung tetsükdaksü ajurur aser school aika nung RMSA scheme nung 2016 batch tesayurtem lir.

Nagaland nung primary tesayurtem tim mesüi shimoker: ANPSTA

Kohima, September 9, 2025 (TYO): Nagaland nung primary tesayurtem shimokba maparen nung tim masüba aser ochimashi lir ta All Nagaland Pre-Service Teachers Association (ANPSTA)-i metetdaksüogo.

Tesüiba küm 10 tsüingda primary tesayur 1,000 tema advertisement kecha melii dang shimokogo aser parnok ya tashishitsü keta shimok ta ANPSTA-i ashi.

Right to Information (RTI) applications aika ajanga recruitment data nung tim masüba aliba bushitetogo ta parnoki ashi.

2016 nungi tang tashi tashi primary tesayur 401 shimok. Ajisüaka jungjunga asadang nung association-i tenüng aika aiben enoka aliba mesüra maliba angu. Iba ajanga confirmed

appointments 397 lir ta RTI responses nungi bushitetogo ta ANPSTA-isa ashi.

Iba mapang tsüingda mapa ana atema yimjak nung advertise asü. 2020 nung ka Mon nung aser 2021 nung ka Wokha district nung liasü. Ibaji ajanga mapa 395 ji public notice mesüra inyakyim meshitak ajanga backdoor appointments asüba lir ta parnokisa ashi.

Talisa, tesayurtem parnok 65 bo mandatory teacher qualifications mali. Parnok ket nung PU aser BA nungi matriculation level qualifications mali ta ANPSTA-isa metetdaksü.

Education department-i RTI telangzübatem nung osang tejangja magütsüteter. Iba inyakyim ajanga education quality tamajung küm daksür aser tarutsü putu

atema teraksa bentsür arur ta parnokisa ashi.

Sorkar dang aiben mepishiaka mapa meinyakba atema mepelar. Tanüingba primary tesayur 1,168 atema open recruitment process ka alitsüla ta ANPSTA-i takhangba agütsüogo.

Supreme Court-i November 2023 nung tetuyuba ka agütsüba nung ECCE mesüra Montessori qualifications magizüktsü saka Diploma in Elementary Education (D.El.Ed) candidates dang shimoktsü shia lir.

Iba dak sendakba nung Principal Director, School Education, Nagaland dangi shidi ka zülüogo aser hopta asem atatsü. Iba tsüingda department-i parnok teinyaktsü meinyakra ozüingi melaba ama lungkak aittsü ta ANPSTA-isa metetdaksü.

Lumding nung Naga tsür T. Machapakla Ao tushi

Lumding, September 9, 2025 (Agencies): Lumding nung Nagatsür Wt. T. Machapakla Ao-i Assamese medium school ka tenzükba atema tenüngsang agütsüba sentong ka agiogo.

Iba sentong ya hopta ana nung khen adokba Matir Manuh osangkaketi ayongzüka agi. Wt. T. Machapakla-i 1956 nung school lapok aser iba ya Lumding shisaliok putiotsü nung alizüng ka liasü.

Iba sentong nung Rajkumar Baishya (Chief Editor, Matir Manuh), Deepak Mena (Executive President), Minati Sharma (Director Member), Prashant Hatimota (General Secretary), Sujata Sharma (Social Media Secretary), Anup Arandhara (Secretary, Mung-Dun-Chung Kham, Assam, NE India), Dr. T. Lima Jamir (President, Nagaland Indigenous People's Forum), Kiketho Kika Sumi, Secretary), Bharat Tamuly Phukan (Lanka Social Worker), aser nationalist leader Hasibur Rahman nungeri o jembi.

Iba sentong nung Machapakla nem japi, gamosa, seleng, aser



T. Machapakla Ao

kulikaket ka agütsü. Matir Manuh Chief Editor Baishya-isa Assamese school jakdang la nüngtem nung kürakyanglu ka yanglutsü ta osang metetdaksü.

Lumding ya taoba Nagaon aser Hojai district tem arrtsülen lir. 1956 tashi idaki Assamese medium school ka danga maliasü aser Naga, Kachari, Karbi, o tanga tanurtemi Bengali medium schools nung dang zünga aru.

Iba mapang mangdang aketba lanurtem- Haidar Rahman, Raunak Ali, Nandeswar Sharma,

Kamaleshwar Bora, Bhadrakanta Das, Bhaven Khaound, Raheshwar Hira, aser Prahlad Das nungeri Assamese medium school ka lapoktsü merang saka ali maliba agi melapoktet.

Idangji Lumding mouza nung moujadar Wt. T. Machapakla Ao-i school lapoktsü atema kanga dang mulungsoa lar ali nungi katha 2 tenla agütsü

La teyari ajanga 1956 nung Assamese school lapok aser 1959 nung government recognition angu. 1960 nung Lumding Assamese High School amenok aser mezüng headmaster ji Mahendra Pathak liasü.

Iba sülen 1968 nung high school examination center amenok aser tanü iba reju ya government-recognized school kümogo.

Tanü agiba sentong nung Wt. T. Machapakla Ao dak alia school tenzük dang shilem agir ajak nem tetushi agüja liasü.

Assam Sahitya Sabha-i la nem ano tenüngsang magütsü lir aser iba ya parnoki tebilemtsü mabenba ajanga lir ta tanü sentong ayongertemi ashi.

Mokokchung nung NSSK training tenzükogo



Dimapur, Rongjui/Sept. 09 (TYO): Healthcare workers atema Navjaat Shishu Suraksha Karyakram (NSSK) training anogo ana asoshi IMDH Conference Hall, Mokokchung nung September 9, 2025 nü tenzükogo.

Kinü tanur asüba ajemdaktsütsü atema healthcare workers nem kinü tanur anepaluba yimyatam angazükdaktsütsü nükjiding nung iba training ya agütsür.

Dr Limanaro DPO (UIP&RCH) ajanga o tatsüka jembidang, training nung adener dang iba sentong ayongzükba nükjiding lemsatop aser health facility nung kinü tanurtem tajungtiba nung anepalutsü asoshi temulung agüja training nung dena nüngdakba shisatsü angazüktsü ajungshia liasü.

Iba training nung shisalen sayur Dr Imlisenba Paediatrics ajanga NSSK programme

indang tongmelang agi rasaa ashi aser tanur asotsü atema renemshiba, tanur asodang amshiba osettsüset, infection nungi kumzuka aliba, tanur asodak mapa inyakba, positive pressure aser ventilation atema mera, tetsü aser tanur anepaluyim, Neonatal resuscitation, mamatzü agütsüba, Kangaroo mother care (KMC), Immunization, discharge aser follow up plan indang training agüja liasü.

NPF aser NDPP tsüngta tepila mali: K. Therie

Dimapur, Rongjui/Sept. 09 (TYO): Cock (an tepong) symbol ya tenüng aika lir, saka mezüngpur lenir aikati mapa tajung inyaka liasü. Parnok aika linük meimer liasü. Parnoki 'non-violent principles' nung amang aser 1929 Naga Hills Memorandum nung tenzükba yimten tebilemtsü bentettsü kanga meranga aru.

Liyonga arudang temelenshi aika liasü. Tanübo NPF akhi ama masü. Tesüiba mapang ama masü, tangbo NPF aser NDPP ya pei agitsü bilema ochimashi mapa inyakba nung kokdaktsür aser parnok tamang Hindutva nem bendanga agütsüoggo, ta taoba Nagaland Pradesh Congress Committee tir K. Therie-i sangdong ka nung ashi.

BJP-i NPF sorkar den lungjemer Manipur nung Khristanpur ajunga samatsütsü inyakba sponsor asü. Khristan pur adianutsürtem mangsa yimdong süa jajadaktsü, tashiyim amshia shi nung medem aser tepset, saka NPF-i maneni BJP sorkar bhukuma

nokdak. Tang Manipur aser Arunachal nung NPF tashi mait kumogo. Tashi maitba ajanga 'intrusion, infiltration, occupation,' sarusaji tali meshiba aser tashiyim amshia rakzükraktepba tali kumdaktsü, ta pai ashi.

NPF aser NDPP tsüngta tepila mali. Parnok ya balalaba dang lir. Party anaprong ya Khristanpur anemer, solution anemer, Nagaland nung aliba Naga nunger anemer aser ochimashi mapa inyakba nung champions lir. Parnok ya 'high commands' ana kasa lir. Ka kuma lungjemba ya süklep 90 talang sen agi yangluba süngyanglu matsüngdang bendanga agütsüba lir, ta K. Therie-i ashi.

CM dak tenokdangba makaba tashi lir, aser aji ano amshitsü amai lir, kechiaser pa azüoktsü kecha maka. Loktepba ajanga Alliance ya pa taochi nung alitsü. NLA nung züngsem ajunga mangmanga aser vote agütsür nem telangzüba kecha magütsüteti par kümsük tembangtsü, ta ashi.

Tematiba lenirtem densema Nagaland indang Legislators aika tebilemba tamajung nung alirtemi (intruders) totuyuba agütsüba angaba ngua süngmanger. Nagaland sorkar teyari nung item 'intruders' yagi Nagaland amokbanga lir. Nüburtem ajemrepa yutsür, pei sasa tentetba sorkar balala nem saru agütsür. Parnoki tepseter, rakzükraktemer aser Nagaland mashi lenmang nung anisar, ta K. Therie-i ashi.

Tejashitsüka, parnok loktepba sülen 'cock symbol' yagi Khristan yimsü anema nokdaktsü, shirnok Hindutva ideology den lungjemer inyaker, political solution anemba party, 'intruder' aser linük nung ochimashi mapa tulutiba inyakba party. Tebour tajung cock symbol ya tangbo lenir majungba yong menenatokogo.

Ni ajungtsü atema sangdong agütsür masü, saka Nagaland Legislative Assembly ajanga Nagaland majemshidaktsüner. Nüburtem tesunep, akumtsüboa aser taochi nung alitsü langa lir, ta K. Therie-isa ashi.

Ao Senden-i Mangmetong...

"Iba ya nisung kar arishi atema inyaker masü saka asen lima gari lenmang tajung aginür", ta pai ashi. Iba lenmang dak sentakba nung 8th Aug. 2025 nü Ao Senden-i PWD (R&B) Minister, Kaito Aye dang tiyongi aita iba mapa tekaratiba nung inyaktü asoshi tezüluba ka agütsü, ibaji agütsür 8th Sept nü ita ka jungogo, anungji, iba lenmang nung terenlokba kecha lir mali ta tsüngtong reprangi aruogo, saka terenlok noklang shilem nung 9-10% dang aliba ngua kanga sasa-a bilemer aser kheni temulung masür, ta pai contractor aser department ketdangsurtem dang mepelaba ashi. "Tanü semdangba ya tatem masü, ibai merenem tashi maneni meita reprangtsü", ta Ao Senden tirisa shisem.

Ali aonba (earth cutting) mapa kilometer 10 shi meinyaki lir, ibaji

timtem maliba tesemtem nung taküm November ita tashi nung tembangtsü aser tan ita nungi culvert, wall anangba, kilentzü mapatem tenzuka inyaktü aser road metalling mapaji sangküm March 2026 tashi nungbo renemtsütsü, ta contractor Ghunavi Aye-i nangzuka ashi.

Iba mapa ya ita 18 nung tembangtsü work order nung shia lir, aji saka, ya mapang atsüra asünung, sangküm March 2026 tashi atsülangjang ta mapang meshia lir, ta contractor-isa ashi. Tang ita nungi mapa ajak tenzuka aotsü aser work order nung aliba ama inyaktü, ta paisa nangzük. Koba tesem nungsa ali dak sentakba nung timtem lir, item nungji nenok teyari nüngdaker, ta paisa Ao Senden, Lotha Hoho aser ali tangshia aliba yimtsüngtem dang mepishia ashi. Paisa anogo tenet nü tsüngta pai

(TAPAK 1 NUNGI...) tanü telok dang nangzükba otem tezüluba nung tongtsütsü, ta metetdaktsü.

Lotha Hoho tenüng nung Jt. Secretary, Chumbemo T. Ngullie-i jembidang, iba mapatong nung sen magi-i nüburtemi bendanga agüja amalitepba ama tanga project aika malitsü. Saka mapa kanga anialema inyaker, anungji, nübur ain madokdang tekaraba nung mapa inyaktü asoshi tekaden pur ajungshia liasü. Paisa Ao Senden-i iba mapa achayangba asoshi pelaba lemsatop.

Tanü iba senden nung shilem agia jembir ajaki contractor dang mapa junga meinyakba asoshi mepelaba o aika ashiba den yaktatiba nung iba lenmang renemdaktsünür, ta mepishia metetdaktsü. Iba lenmang ya yanglura district 5-6 nüburtem lenmang aisü nung tajangzük angutsü.

Kohima Police ajanga metongshitsür

Dimapur, Rongjui/Sept. 09 (TYO): Kohima nung takep ayokba network ka putetba dak sendakba osang September 6, 2025 nü adoktsüba nung tai tonglokja alisang Neisedenuo Thuphre ya Chakhabama yimtsüng

nungi lir ta aibelena sangdong.

Tai tonglokja alisang ya Kohima district kübok Sakhabama nungi lir ta jangjashitsür aser aibelenba atema sasar, ta Kohima Police sangdong ka ajanga ashi.

NBSE-i HSLC & HSSLC Examination 2026 atema metetdaktsür

Dimapur, Rongjui/Sept. 09 (TYO): Nagaland Board of School Education (NBSE) sangdong ka nung, HSLC & HSSLC Examinations 2026 atema Regular, Repeater aser Compartmental students asoshi September 22, 2025 nungi October 10, 2025 tsüngta forms fill up asütsü, ta metetdaktsü.

Iba tatidang agütsütsü aliba candidates temi NBSE portal nbsenl.edu.in ajanga Application Forms fill up asütsüla, Institutions/centres temi NBSE portal nung login sür forms tem jangjashia tekalen shia aliba mapang nung category balala indang examination fees agütsütsüla, ta sangdong ajanga ashi.

Regular Repeaters, Centre repeaters aser Compartmental categories candidates tem tang (2026 Examination) nungi tenzuka

parnok category ya taoba mapang ama masü "Repeater" ta sür category ka nung lokteptsü ta meteta alitsüla. Parnoki parnok tesüsa azüngba school nungi dang forms ya fill up asütsüla. Maneni Heads of Centre Schools tem dang Centre Repeaters aser Compartmental categories nem iba inyakyim nung yariteptsü mepishir.

Heads of Institutions dang Class X & XII level nung Selection Test magitsü ano maneni nenshia metetdaktsür. Academic tsütsü tashi maitba kaketshirtem tajungba kumdaktsütsü asoshi remedial measures, special classes amala agütsütsü asoshi akok tashi mera agütsüla, ta ashi.

Application Forms yokba atema kaketshir dang nungi sen tali memeshitsüla, ta NBSE sangdong ajangasa ashi.

District ajunga nung 3 buba National Lok Adalat alitsü

Kohima, Rongjui/Sept. 09 (TYO): Linük den külemi 2025 atema 3rd Quarterly National Lok Adalat (People's Courts) ya Nagaland State Legal Services Authority (NSLSA) tawabangba kübok September 13, 2025 nü district headquarters ajunga nung alitsü.

Iba atema District Legal Services Authority (DLSAs) ajanga Lok Adalat Benches 11 amenoktsü.

Legal Services Authorities Act, 1987 aser National Legal Services Authority (Lok Adalats) Regulations, 2009 in the Courts and Tribunals nung shia aliba ama, State Legal Services Authority kübok District Legal Services Authorities (DLSAs) ajunga nung küm nung National Lok Adalats pezüben agia arur.

National Lok Adalats (People's Court) nung pre-litigation aser pending cases tem benoka jembir, kong Section 138 kübok National Insurance Act cases; Money Recovery cases; Motor Accident Claim cases; Labour dispute cases; Electricity & Water Bills amala Public Utility services dak sendakba ken o (non-compoundable maden); Matrimonial disputes (balaluyaba maden)/ Family

disputes, Land Acquisition cases; pension cases densema Service matters; Revenue aser danga ancillary matter, High Court, district Courts aser state/ district/ taluka authorities nung anendaka aliba, IPR matters/ Consumer matters/ ano danga quasi-judiciary authority nung anendaka aliba ken o tem jembir.

Ano civil cases (rent, easmentary rights, injunction suits, specific performance suits etc) amala jembir.

2nd Quarter NLA ya May 10, 2025 nung agia sen 2,38,99,111 jenjang ken o 219 benteta liasü. Iba mapang ken o 290 benoka jembir.

Iba sentong asoshi osang tali tejangjaba metetner temi District Court telungzük nung DLSAS indang Front Offices mesüra Office of the NSLSA, Top Floor, NPA Building, DC office compound, Kohima mesüra toll free NASLA Helpline 15100 mesüra NSLSA Helpline number-9118003453883 mesüra email nslsa.nagaland@yahoo.in nung tongteprateptsü akok.

DLSAs shia indang disposal data ya maneni state authority indang web portal nslsa.nagalandgov.in nung upload sütsütsü.

PM Modi-i tzümetstung agi kongshir aliba Himachal semdang

New Delhi, Rongjui/September 9 (Agencies): Ato Kilonser Narendra Modi-i Mongolbarnü tzümetstung agi kongshir aliba state; Himachal Pradesh semdangogo aser senotsü teyari sen crore 1,5000 agütsütsü nangzükogo.

PM-i, state aser nüburttem asüngsashitsütsü atema lenla ajak kanga junga asadangtsü ayongzükogo, ta ketdangsürtemi metetdaksü.

State nung PM Awas Yojana ajanga kitem yanglushitsütsü, Prime Minister National Relief Fund mesüra PMNRF kübok national highway aser school tem yanglushitsü aser iba den kiset shirurutem atema kit tem

lemtsütsü asoshi jenjang agitsü. Aluyimertem nem teyari agütsütsü kanga nüngdaka aliba reprangteta aluyimertem shirnok tang power connection agi anünga lir parnok nem teyari talila agütsütsü, ta ketdangsürtemisa metetdaksü.

PM Awas Yojana kübok ki raksar alibatem geotagging asü tenzüksü. Iba ajanga ki raksaba jenjang tajungba asatetsü aser teyari takaratiba agütsütsü.

Kaket shisatsü kecha tetsükdaksü makai agütsütsü atema school tem-i raksarakbong indang osang agütsütsü aser item teraksatem geotag sütettsü,

aser iba ajanga Samagra Shiksha Abhiyan kübok mapang shitak nung teyari agütsütsü.

Tzü bendena ayutsü atema recharge structure tem yanglutsü. Iba ajanga ali telung nung tzü level tajungba achaayangtsü aser tzü tajungba achaayangtsü asoshi teyari agütsütsü.

Modi sorkari Himachal Pradesh semdanga teraksatsübatem asadangtsü asoshi inter-ministerial central team tem yokogo, aser parnoki osang tejangja agütsüba dak ajemdaker teyari balala agütsütsü atema asadangtsü ta ketdangsürtemisa metetdaksü.

Delhi Police-i kinü tanur shibelenertem apu

New Delhi, Rongjui/September 9 (Agencies): Delhi police-i Hombarnü tanur shibelenba telok ka putetogo. Delhi aser kidanger state tem nung inyakyim ka indang itangitertem nungi osang anagzükbä sülen iba telok ya pua liasü.

UP kübok Banda tesem nung longru yanglur kati par jabaso (ita trok) August ita Sarai Kale Khan nung bus stop ka nungi pua bener aoba indang osang agütsüba sülen iba inyakyim indang ya jangja aküm.

Ita trok tain tebur chanusang ya pua bener oa doctor ka dang sen lakh 1.5 agi ayok, shiba Agra nung KK Hospital kibur liasü.

Hombarnü Delhi Police-i UP kübok tesem balala nungi iba inyakyim nung densema alir nisung 10 apuba jangjatsüogo. Parnok apuba mapang Sarai Kale Khan ISBT nungi pur aoba ita trok tanobusang densema kinü tanur trok nguteta liasü.

"Tanur trok rongnung kabo

August 22 nü Sunlight Colony police station nung par tsürapuri ken o benoker aliba dak sendaka liasü. Tanungba tanurtem tsürapur jangjatsü atema onoki tang inyaktepdar. Tanurtem Delhi-i anir aruogo aser child welfare committee (CWC) dangi benerogo, shirnoki parnok Delhi nung shelter home temi yokogo," ta deputy commissioner of police (southeast) Hemant Tiwari-i ashi.

HT den jembiba mapang ketdangsürtemi ashiba agi, item nisungtem yagi kinük tanur aser talisa tebur chanutem pua bener oa tanur malirtem dang ayoker.

Kasa mapang nung parnoki tanur ayokertem dang tanurtem ya parnoki temzüng ozüng kübok adopt asür ta bilemdaksür aser sen lakh ana nungi pongu tashi meshir.

Ken o bushisüngdangba sülen, parnoki yagi sensaker kibongtem mesür aser mozükitem nungi kinü tanurtem alizüker, ta ngutetogo.

Mauritius PM-i India semdang; PM Modi den ajuruteptsü

New Delhi, Rongjui/September 9 (Agencies): Republic of Mauritius Ato Kilonser Dr Navinchandra Ramgoolam aser la kinungtsü Veena Ramgoolam nati September 9 nungi 16 tashi India semdangtsü, ta Ministry of External Affairs (MEA)-i metetdaksü.

Mauritius PM September 9 nü Mumbai tongogo aser par team September 10 nü Varanasi-i aotsü sentong lir.

September 11 nü Ato Kilonser-i Indian Foreign Secretary den senden ka amentsü aser iba sülen Ato Kilonser Narendra Modi den ajuruteptsü.

September 12 nü Varanasi aser Ayodhya nung sentong aika agitsü renema lir aser iba sülen September 13 aser 14 nü Dehradun nung sentong balala agitsü aser September 15 nü Tirupati semdangtsü. Kasa anogo Mauritius PM aser par team ya Delhi-i aotsü.

Ramgoolam aser pa kinungtsü nati Rajghat aser Sadaiv nung naro toktsütsü, Parliament Building tasenba

semdangtsü aser tir aser Cabinet Minister tem den senden amentsü. PM aser par team ya Delhi nungi apusoa aotsü, ta MEA-i metetdaksü.

Temetettsü kaji Ato Kilonser Ramgoolam-i tang term nung tang mezüngbuba India semdang. pai taoba mapang 2014 küm May ita India semdanga liasü. Pa ya Ato Kilonser aser Council of Ministers tem tenangzüktepbä agiba sentong nung adentsü jaoka liasü.

Linük ana tsünga t e s e n d a k t e p akangshitsü atema Ato Kilonser Ramgoolam-i PM Modi den sensaksem balala agitsü aser tir Droupadi Murmu dena senden amentsü.

India aser Mauritius na sobaliba, nüburttem aser puti otsü tesendaktep takang lir. Mauritius ya India atema Indian Ocean Region nung tongtibang maritime kidanger ka lir

Indo-Nepal arrtsü nung security akangshir

New Delhi, Rongjui/September 9 (Agencies): Nepal nung mepetmesü adoker aliba mapang Sashastra Seema Bal, shirnoki atsü matsü aliba India aser Nepal na arrtsü km 1751 anüker, parnoki arrtsü post ajak aser lendong adoktsü ana nung aliba tesemtem nung security akangshiogo.

SSB field commander ajak dang pei tata tesem metoktsüi alitsü, aser meita aoba sentong ajungketshitsü tetuyuba agütsüogo, ta parnoki ashi.

"Arrtsü nung outpost 22-i Sashastra Seema Bal sepai talila yokogo aser arrtsü kübok tesem pongu nung police station temi drone camera amshia meita atadar," ta Superintendent of Police Vikas Kumar-i Balrampur nung ashi.

Paisa, itangitertem danga ken o kanga junga asadanga atatsü tetuyuba agütsüogo, aser Balrampur kübok arrtsü km 85 aliba nung ata aliba sepai ajak dang kanga kümküma alitsü metetdaksüogo, ta ashi.

Police team tem aser SSB jawan tem longjemer patroling senzüdar aser iba tesem nung 'Operation Kavach' committee dang kümküma atatsü aser arrtsü adena senzisenpong kanga junga meita atatsü metetdaksüogo.

Social media amshitsü atema tenokdangba agütsüba ajanga longkak ait tenzükba azütokshi lendong tulu akümba sülen Nepal PM KP Sharma Oli-i Mongolbarnü mapa toktsüogo.

(Maneni tapak 8 nung...)






Nü pension ya chichiba tekümzükbä kümdakjang.

Tanü NPS nungi UPS-i melenang!






① **Unified Pension Scheme (UPS):**
Central Government Employees ajak atema Guaranteed Pension Scheme.

Nü indang assured payout kümzüka yuang.
September 30, 2025 nü tashi nungbo UPS shimang.
Iba maongka ya tanaben marutsü!

Arishi küm 59 majung tsünga mashi mapang nung UPS nungi NPS-i melentsü atema khen maongka angutsü.

Osang tejangjaba agitsü atema www.pfrda.org.in semdangang mesüra UPS Help Desk (Toll-free): 18005712930 dangi call süang.

[@PFRDAOfficial](#) | [@PFRDAOfficial](#) | [@pfrdaofficial](#) | [/company/pfrda/](#) | [@pfrdaofficial](#)



Scan this QR Code to know more



TIR YIMYIM YIMOBILEM (EDITORIAL)

DIMAPUR WEDNESDAY, SEPTEMBER (RONGJUI) 10, 2025

Nepal dak tan südi !

Nepal government-i ajungbena dang mobile phone ajanga osangtsüsang agitepba lenmangtem, Facebook, WhatsApp, Instagram, X, aser YouTube dena Social media platforms 26 shibangtsüba agi lanurtem ain adoka yakanü hombar anepdang nungi Nepal yimtiba Kathmandu nung telok tulu kuma adenshir longkak ait tenzük. Iba lokti senden nung adenertemji arishi küm 30 teküpbok lanurtem dang liasü aser parnok aika school aser college nungi uniform agir adenshi. Ibai Nepal government anema Nepal nunger yimten telok kati anema apusoba mapa ka masü, saka lanurtem mulungjang nung tejashi poktokba mapa ka amai lir . Atangji, Nepal government-i social media platforms paikaji shibangtsübaji, tatemtsübo, social media platform ajanga nübortem, talisa lanurtem taküm meraksatsüsa azüoka ayutsü asoshi Nepal government kübok 'register' asütsü aser menügdakbatem kechisa social media platform nung enoka ali, itemjia endoktsü asoshi 'company'tem nem metetdaksür liasü saka parnoki mangaba agi September 4 nü Social Media platform 26 ji shibangtsü. Tanü putu nung, talisa, lanurtem kodaser social media melii litettsü ? Kidang kibong nung tanurtem mapa inyadaksütsü aser lesson bushidaksütsü asoshi mobile phone rakzüka ayu nunga ain adoker nung koda ? Aji oda, tang Nepal nung government anema ain adokbaji ibaji tera mesüka lir. Ajisüaka, tema tereprangtsü aser tanatsü dang ashi, Nepali nunger lanurtem ain adokbaji social media platforms shibangtsüba kisüngjibo masü aser Nepal government-i social media platforms shibangtsübajia company-temi registration magiba kisüng agibo masü. Nepal lima ya chuba yimli nung liasü saka chuba yimli atsüngdoker, asenok ama election agia democratic government aküm. Ajisüaka, tangbo ano Nepali nungertem asoshi Democracy dangbo chuba yimli, Monarchy,-ang tajungba ta asütsüsa atalokbaji, election nung adoka yimsü asürtemi ochimashi agi pei agitsü rongsen dang bendener aser pei chirnurtem jenjang dang yanglutsür. Aji oda, Nepal nung yimsüsür chirnur aser kinungertembo khen nung takar aküm saka nübortembo tesensakba akümer. Aji oda, Nepal nung sensaker chirnurtem school fee magütsüteter aser küm nung tula ka malitet timatem dang, Nepal nunger yimsüsür chirnurtembo jenjang tulu aketba 'branded' süoshi agir gari tajung nung mener senzür aser government sen endoka alima tesem balala repranga oli aruli ta senzüba angudang, Nepali nunger sensaker chirnur lanurtem temulung shirangdaksü. Iba ama temulung shirangba aser jashiba ajakji lanurtemi social media platform balala nung lemsateper aser government anema ain adoka zülutepba mapang ka, government-i item lanurtem adenshia sensaksemba ki, social media platform, ji shibangtsü. Tetezü, government nung alirtemi parnok anema social media nung prokshibaji maginü alitsü aser ano yaküm küm Nepal nung akhi ama chuba yimli dang bener arutsüla ta akangertema karbo tepuokdak puoka ayu. Iba denji, ano, Nepal government nung yimsüsürtem rongnung kecha tarendak melii pei inyaknüsü inyaksü atema 'oppositionless government' ama ka, ato kilonser Oli-i aniba government ya Nepal nung yimten telok tuluba ana Nepali Congress aser CPN-UML na longjemer akümba government lir. Item yimsüsür taintem anema shibai ola adoktetsü (?) ta parnoki bilema, government nung parnok awazünüsü awazür alitsü ! Iba ama nübortem mezüngshii pei asoshi dang bilema ochimashi mapa inyaker aser parnok chirnurtem dang Nepali nunger lanurtemi "nepo babies" ta ajar aser lanurtemi parnokji putu tasen nung asor "Gen Z" telok lir ta ayimtena, parnoki ochimashiba yimsüsür taintem anema apusor. Joko, nisunga süogo, tatar senden aser yimsüsürtem ki tashi rongdokogo, anungji yimsüsürtema pei lima nungi ajentsüsa kümogo. Item ajakji nübortem asoshi inyaksü purtemi pei kisüng ajungtsü aser akatsü bilema inyakba ajanga pei taküm aser kibong dang masü saka pei lima dena akoksatsüsa atalokba lendongtem lir. Asenoka yangji tan asütsüla.

OLEMSABANG

SEN ASER RONGSEN KISÜNG AGI NISUNG TAKÜM MALIR

~ L. Kika Pongener.

(Yashi adok nungi...)

Anungji shirnok nem Tsüngremi rongsen moatsü, parnok ajaki Tsüngremi moatsüba rongsen jagi alima nubur asoshi terenlok mapa tajung inyaksüba lenmang nung amshir asü (?) Mesüra alima raksatsü, yimden, arogo aser lokti raksatsü, mepetmesu aser telemsa adokdaksütsü..... Iba amala lenmang nung amshir.....??? Ibaji asenok ajaki khen arok-aroka shisadangdi.

Asenok alima nung arishi talangka aliyongjia tenem ser metsü, mesüra lir ana-su dang alitsü....ta laishibai ashir. Anungji iba arishi tatsüka alidangji, mapang tajung alangzüka mapa tajung inyaksüla. Asenoki Bank aika nung sen aika rizünga yur, ki tulu aika atongtepa yanglua yur, kimong-lumong aika alidena yur, chiyungtsü chir mechima nangdaka yur, taküm jangradema kecha tebilemtsü makai liaka, saka item rongsenji magishitsüsa, chiyungtsüji mechitetsüsa, aser anu kodang adoker kodang ayir memeteti, yipden nungi mesakteti, asen sasa asen temang memeyipteti, ayako dena alitsüsa tashitak tamajung kar agi menupra...!!! Iba ama aliba takümü arishi küm noklangka liaka tali meshizük asütsü. Aser ano tia makar karbo anjung tenari dang anu ayiba ama, anojungi arishi leptokra kanga tesasatsüka asütsü...!!! Yisu-i o entepba ka ashiba bilemteter....Takar nisung kati alu nung tsük jenti aro, aser pai pei temulung nung ashi.... Ni kechi inyaksü (?) Kechiaser ni kü tsük konga tayudak maka. Ni kü Jen-tem benzüker tuluba yangludi aser idakji ni kü tsük ajak rizüngtsü. Aser ni kü Tanela dang ashitsü, "Tanela küm aika asoshi rongsen aika rizünga lir, kazüa liang, Chiang, jemang aser pela-a liang". Saka Tsüngremi pa dang ashi, Na tamashisang !!! Taonungsa ne taküm ne dak nungi akangtsü, aser kechi rongsen nai rizüng aji shir meyong asütsü ? (Luke-12:16-20) Aji oda, iba takarsang tsük paikaji bendena liaka, Tsüngremi "Taonungsa ne taküm ne dak nungi akangtsü" ta...'O' ka dang ashi nung aji tatempang liasü. Asenoki rongsen dak temulong lemer Tsüngrem memeteti taküm lira, asenok daka kechi ataloktsü aseni meteta maka....Anungji asenoki tamasa Tsüngrem bushidi.

Asenok alima nung aliba ya rongsen (Wealth), tashi (Power), aküm-sentsüket (Prestige), aser menden tajung (Status/Position) kisüng agi alir masü, saka Tsüngrem taochi aser Pa o agi dang taküm ya alir. Alima nung nungtuko nisungtem Napoleon ama, Hitler ama, Alexangder the great ama, tashi aser rongsen tulu akartem; parnok tashi aser rongsen agi pei taküm malizükteti anojungi arishi tembangba otsü lir. America nunger Bill Gates mapang kabo alima nung takatisang liasü; saka pa-a rongsen agi taküm mekümzükteti anojungi sua-atok. Asenok mimchir-i sen bushidang Tsüngrema ama-atoker, nisung taküma mapayur aser taaktsüba shisatsü meli-i akümer. Ajisuaka, aseni bendenba rongsen jagi asen taküm mekümzüktettsüsa kenu mapang ka arutsü. Kenu aseni bendenba rongsen ajak toktsür teka tazüng leperi aotsü. "Nisungi alima ajak ajangzüker pei taküm madokra kechi ajangzüksü ? Mesüra nisungi pei taküm melen kechi agütsütsü ?" (Mati-16:26). Tesasatsüka, tanü putu nung yimsusur / lennir tajung aika sen agi tenuk pokadoker, shiruru jenjang nung taküm lisa-a aliba aika angur. Tsüngrem lar aser arogo nung toklang tenzükertema aika sen nung alanger, Yihuda Iskariot ama senyong pei jakla yoka chir....Pulpit nungi Tsüngrem 'o' kanga ra-a jembiyongjia nuburtemi nang-nanga magizüksüsa taküm lisa-a aliba angudang kanga sasa-a repranger. Asenok taküm ya sen aser rongsen kisüng agi alir masü, saka Tsüngrem bang nungi adokba 'o' agi taküm alir. Tsüngremi asenok dak nungi tangola ya agienadokra iba minute-second nungji tatempang asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung temeshi ainlen jajar ka khaset



Pakistan nung Punjab province kübok Marian shrine nung putir kati anir Mass agiba mapang tangokba noksa nung angur.

Lahore, Rongjui/Sept. 09 (Agencies): Pakistan nung Lahore anasa Marian shrine tulutiba bushia van ka nung temeshi ainlen jajar nisung 18 mener aodang September 7, 2025 nü mejangjaba nisungtemi injang khaloktsüba nung arishi küm 42 tain Catholic nunger ka khaset aser lanur ka yiru.

Tanur pezü tebu Afzal Masih dak tekok nung akha aser mozü kidangi bener aoba mapang asü, ta police-i ashir. Arishi küm 16 tain ka yiru.

Parnok ya alima tesem ajunga nung September 8 nü Catholic nungeri amungba Nativity of Mary indang benjong nung shilem agitsü asoshi Mariamabad yimtsüung nung nüngtugu shrine ka bushia aroba liasü. Parnok ya Punjab province nung iba shrine nungi kilometer 30 shi pilar Sheikhupura nung lia amak.

Masih'er kinunger Aurangzeb Mehmood-i police nem ken o agütsü aser motorcyclists temi lenmang nokdangba sülen van ya amak ta ashi.

"Masih-i tai apu, anungji parnoki pa gari nungi atsüzüker akha," ta Mehmood-i ashi.

Masih ya 'teen gang war' ajanga asüba lir ta police-i ashir. Masih tepset ta temulung melemi alisang Muhammad Waqas ya jenshia senzür aser police temi pa aputsü bushir, ta investigation officer Sakhawat Ali-i ashi.

"Waqas ya temesepba chiyongsü achir ka lir aser pai 'rival gang' ka dak tenük yoka liasü. Parnok khatepba mapang Catholic nunger ya tetsüngtai ai," ta officer-i ashi.

Catholic nunger noklang aika September 7 nü Lahore nung Masih asüpila sentong nung dena liasü. Ibai Mariamabad nung küm shia September 5-8 anogotem Marian benjong amungba tatemba anogo ajurur alitsü.

Security asoshi police 2,600 aser volunteers 600 shi yoka taküm iba benjong nung nisung million tesadang ka shi aden, ta pilgrimage committee ajanga ashi.

Pilgrimage security

ketdangsür Father Abid Albert-ia iba lendong asoshi temulung raksar ta shiogo aser nüburtem dang süngjema alitsü ayongzük.

"Police temi shrine leni aoba lenmang nung snipers yok aser lenmangtem meita sepaitem senzüdaktsü. Tejashitsüka parnoki nisung takum samaba nungi menokdangtet," ta putiri ashi.

Teyariteper memonui aru asübo Masih takum kumzüker lila, ta Mehmood-i ashi.

Tekumzükertem menur aru. Pa police van ka nung bener mozü kidangi ao, saka len tom nung asü, ta pai ashi.

British nungeri yimsü asüba mapang 1893 küm yangji Mariamabad Catholic village kumteta Marian shrine ya amenok. Liyonga arudang Marian shrine ya national Catholic pilgrimage site ka akum aser 1949 küm nungi yangji Feast of the Nativity mapang küm shia pilgrimage alir.

Kiralongrar temi azüdokshiba agi sünga aliba linük ka nung pilgrimage committee yagi annual pilgrimage mapang security akangshir.

Taoba küm pilgrims tem mena aliba gari ka amak, saka police tem mapang shidak nung arua nisung kata meyiru.

Taküm May ita Khristanpur alidak nisung khasetba ajanga security akangshia kumogo.

Good Samaritan Society for Development and Rehabilitation nung tekolakba aser Khristanpur asoshi okatsür Kashif Nemat-i iba lendong ya tamangba yimsü nung ajemdaker agütsüba lir ta ashir.

"Iba lendong ya asür indang tamangba yimsü nung ajemdaker agütsüba tejangja lir. Afzal tepsetba tenük agi angur aser van nung aliba passenger temi ashiba agi, van ya pilgrimage indang posters aser kangki agi sünga liasü, anungji parnok ya Khristanpur ta tejangja sayur. Lendong agütsür temi gari nung mena aliba tetsürtem mesüshiba anendaktsü, aser iba yongji parnok kanga jashia pa reshikangshia amshi aser khaset," ta ashi.

"Lendong agütsüri yimjak nung mapa tamajung inyaktsü asoshi automatic weapon amshiaka police temi FIR nung Anti-Terrorism Act indang Section 7 meinok. Anungji iba ama police yimya ajanga lendong agütsür temulung uludaktsür," ta Nemat-i ashi.

"Nisung tepseter nem ochi obendang agütsütsü asoshi ni iba ken o akok tashi jembitsü. Kasa mapang Khristanpur dang asür kibong yaritsü ayongzüker," ta pai ashi.

Afzal Masih ya rickshaw anishir aser tetsür Shagufta Bibi ya school ka nung mürekmejur ama inyaka liasü, ta par jabaso arishi küm 18 tain Bilal Afzal-i ashi. "Onok kanga sensakser lir, aser ozü tsürabor anaporng mapa meranga inyaka liasü. Iba lendong atalokba sülen kütsü kanga temulung raksar ola madoker," ta Bilal Afzal-i ashi.

Pakistan nütsüung yongsük shilem 96 dak tema Muslim nunger lir, aser Open Doors ajanga Khristanpur alitsü asoshi linük tamajungtiba asadangba 2025 World Watch List nung jenjang ti buba nung lir.

Kerala nung St Carlo Acutis tenüung nung tenlaki ka meshitet

Kochi, Rongjui/Sept. 09 (Agencies): India south len Kerala state nung aliba Catholic Archdiocese kati Carlos Acutis tenüung nung tekülem ki ka meshitet - koba India aser alima nung mezüngbuba alitsü. Iba kasa anogo Vatican nung Pope Leo XIV ajanga "millennial saint" ya canonize süja liasü.

Ernakulam district kübok Pallikkara nung tenlaki tasenba ya September 7, 2025 nü Archbishop Joseph Kalathiparambil-i moatsü. Iba tenlaki nungya England nung asosang Italy nungba (Carlos Acutis) indang relic (kou) ka yua lira ser yangi nisung 600 shi asemtsüsa yanglua lir.

Yangji aliba Catholic nungertem tanen makai iba tenlaki semdanga sarasadem aser Acutis ama akumtsü meranger, ta Vicar General of the Archdiocese Father Mathew Kallinkal-i ashi.

"Iba ama nütsüung adenshitsü onoki kodanga meimla. India

ANOGO ABEN TSÜNGREM DEN

Kümzük (T.Ken 116:1-11)

Tenüungsang Ken 116 shibai zülu pa timtem tia kar ajanga aoba iba ken nung zülu. Shitakba nung pa tasür liasü. Saka Kibubai pai ayimtenba angashi aser kümzük, aser iba indang pai zülu, "Ni Kibuba meimer kechiaser Pai kü ola aser kü temepishiba angashia lir, kechiyong Pai kü dangi Pa tenarong shitsür, aji asünung kopika ni taküm liden ni papikaji ni Pa ajatsü" (t.1,2).

Tsüngremi Pa tila tanur dangi tenarong shitsüba noksa jagi Pai angashitsü asoshi asenok anasai aruba indang sayur. Junga aser jangjaa angashitsü asoshi tangari asenok den jembidang asenoki anasai orr angaa alir. Tsüngremi teti asenoki jembiba angashir, yaritsü asoshi teti asenok anasa alir. Ken züluri asenok dang ashir, "Kibubai tongmelang pur awabanga ayur; ni tajemzükba kümdakja liasü, aser Pai ni kümzük" (t.6). Asenok kümzüktsü asoshi Tsüngremi asenok alidaki arur aser Pai asenok kechi koma südaktsüner yamaji kümdaktsür. "Kechiyong tasü nungi kü taküm, nüktzü ayimba nungi kü nü, aser laoba nungi kü tetsüung nai kümzük" (t.8).

Ken züluri Tsüngrem taochi angu. "Kibuba taochi aka, aser temeshi lir; hau, asen Tsüngrem yimlibilem lir. Kibubai tongmelang pur awabanga ayur; ni tajemzük kümdakja liasü, aser Pai ni kümzük" (t.5,6). Tsüngremi pa tasü nungi kümzük aser pa nüktzü kongdaktsü. Pai tashi itdaktsü aser malangtsü pa tetsüung kümzük.

Asenoka Khrista ajanga iba teyari kar. Paji taochi aser yimlibilem adokdak lir. Ken züluri ashi, "Tasüba lisü agi ni mesangbangogo" (t.3), saka tanela nung pa masü. Yisu pa melena asü.

Na tanü Tsüngremer tekümzükba nüngdaker asü? Pai ne dang angashir aser yarir, pelaang. Ne nüngdak ajak Pa teperiba teka nungi arur. Pa taochi aser yimlibilem lir. Pa tenüung nung jang; Pai na kümzüktsü.

Acutis-i mapa tajung inyakba mesamadaktsütsü aser lanurtem nem pai bendanga agütsür tenzükba indang angazükdaktsütsü mechi pa tenüung nung sarasadem balaka tenzüktsü sentong lir.

Carlo Acutis ya tamang nung takang aser Eucharist kanga meima liasü.

Pa mapang tatsüka takum alidang internet aser digital technology amshia Catholic yimsü temaba jenjangi ajungket.

Pa arishi küm 15 nung leukemia agi asü, saka pa takum aser mapatem aser website nung Eucharistic miracles bendenba ajanga 2020 küm beatification asü.

Asür Pope Francis-i Carlo Acutis ya canonize asütsü liasü. Saka pa temang manemba aser mozüki nung munga April 21 nü asüba ajanga meinyaktet.

Pope Francis-i tenzükba mapa ya pa melensang Pope Leo XIV ajanga taoba Deobarnü renemja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tetsüki**

(v) kümli ait, tezü atsü (feeling hurt, get annoyed)

* Tambusangi tetsüki o jembia mapa anendaktsü.

Tetsülen

(adj) ojala tsütsü sentaktepbatem (maternal connection)

* Par tetsülen nungi kinunger aika lir.



Tir Yimym

OLONG PAITEP # 72656

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7265 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioiktsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA

Taküm October 19 Deepotsav nung Uttar Pradesh kübok Ayodhya nung yaküm Guinness World Record ajatetsü atema sentong renemer. Saryu River anasa Ram ki Paidi aser temeket ghats nung ali agi yangluba diya lakh 26 lakh tema ayutsü ta sorkar ketdangsürtemi ashi. Iba mapa nung Awadh University nungi volunteers meyrjang aikati yariteptsü aser chief minister Yogi Adityanath dena tongti ketdangsürtem lia Guinness World Records adjudicators-i kuli asütsü.

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Manipur nung sepaitemin telungpur aser drug shibelener 14 apu**Imphal, September 9, 2025**

(Agencies): Manipur nung sepaitemi telungpur aser drug shibelener nisung 14 tashi puogo. Iba mapa inyakdang ozüing alema yi yangluba unit ka makdoka liasü.

Army, Assam Rifles, aser Manipur Police külemi tesüiba hopta ka tsüingda Churachandpur, Bishnupur, Chandel, Thoubal, Kakching, Imphal West, aser Imphal East district tem nung mita ao ta defence spokesperson kati ashi.

Iba mapang telungpur züngsem 11 tashi apu, parnok rongnung People's Liberation Army (PLA), Kangleipak Communist Party (KCP), aser

People's Revolutionary Party of Kangleipak (PREPAK) züngsemtem dena lir ta defence spokesperson-i ashi.

Imphal West nung tashiyim agi sen meshir PLA aser KCP züngsemtem apu. Sepaitemisa motorcycles, mobile phones, SIM cards, aser Aadhaar o PAN card dena kulikakettem puogo.

Churachandpur district nunga police-i Guite check gate nung drug shibelener ana- Thanglunpau Sukte (32) aser Hauginlian Phaipi (35) na apu.

Tena ket nung sapon pongdang 176 nung brown sugar seret 1.9 bena alib a apu. Imphal East nunga Aribam

Mansish (23) ta ser nisung ka ket nung ganja seret 1.94 bena aliba apu.

Keirao Louthok Loukon, Imphal East nung mita aodang ozüing alema local liquor bottling facility ka aliba putet.

Iba tesem nung iron bottling machine, empty bottles and caps, opioid codeine-filled containers, camouflage clothing, aser equipment aika ngutetogo.

Assam Rifles-i Narcotics Control Bureau den amalitepa mita aodang Sajik Tampak anasa Rs 6.9 crore shi alang opium seret 138.5 nguteta liasü ta defence spokesperson-isa metetdaksü.

Meghalaya nung sorkar mapa 67,500 tazüing lir" CM Conrad**Shillong, September 9, 2025**

(Agencies): Meghalaya nung sorkar mapa 67,500 shi tazüing lir aser iba atema sorkari sentong ka renemogo ta Chief Minister Conrad K Sangma-i ashi.

Kümshia lanur 70,000 shi ka mapa inyaktsü temsüa akümer saka sorkari küm nung mapa 2,000-2,500 tashi dang agütsüteter. Government sector nung mapa tazüing 67,500 shi tazüing lir aser iba atema sorkari lanur 70,000 shimoktsü atema sentong ka renemogo ta pai ashi.

Tang ya government

department balala nung mapa tazüing 7,000 shi ka nung nisungtem anioktsü mapa inyaker. Lanurtem defence services, banking, aser engineering wadang nung len anitsü atema sorkari career counselling programme agir.

Iba maparen atema Meghalaya State Skill Development Society (MSSDS)-i nodal agency ama shilem agütsü aser state tesem balala nung counselling centres 34 ajanga lanurtem anitetsü.

Defence sector mapa nung candidate tem "handholding" nüngdaker ta Leader of

Opposition Mukul Sangma-i ashi. Idangji Chief Minister Conrad-i iba programme nung item ajak dena lir ta langzü.

Meghalaya sorkar 'Vision 2030' nung sector shia nung mapatem nung nisung anioktsü enoka lir. Tarutsü nung Tourism sector kija nung mapa 54,000 shi adoktsü sentong lir.

"Sorkari department shia nung nüngdakba mapatem asadangogo aser MSSDS den yaritepa career counseling agütsütsü. Iba ajanga taruba küm 10 tsüingda mapa atema maongkatem agütsütsü" ta CM Conrad-isa ashi.

Manipur nungi BJP lennir 3 Congress nung denogo**Guwahati, September 9, 2025**

(Agencies): Manipur nungi taoba MLA ana dena BJP lennir asem tashi Congress nung denogo. Hombarnü AICC headquarters, New Delhi nung sentong ka nung parnok Congress nung aden.

Manipur nung taoba BJP MLA ana- Y. Surchandra Singh (Kakching) aser L. Radhakishore Singh (Oinam) na den tongti lennir Uttamkumar

Ningthoujam nunger Congress nung züngsem aküm.

Iba sentong nung AICC Manipur in-charge Saptagiri Sankar Ulaka aser Manipur Pradesh Congress Committee (MPCC) president K. Meghachandra Singh na aden.

Manipur nung tensa mazüoktetba atema temlung mesüi parnoki BJP toktsür Congress nung aden.

Congress-i yimjung bener

arutetba, tensa azüoktetba aser state nung ajak densema ketdangsübaren inyakba atema parnoki Congress nung züngsem akümtsü mulungtet.

AICC Manipur in-charge Ulaka-i par asem party nung pelaa agizük aser parnoki shilem tajung agütsü imlar ta ashi.

Parnoki ajangshia aruba aser shisatsü ajanga Manipur nung Congress tashi itdaksütsü ta Ulaka-isa ashi.

Toyota Kirloskar Motor-i garitem jenjang ajemba metetdaksü**Bangalore, September 9, 2025**

(Agencies): Toyota Kirloskar Motor (TKM)-i parnok customers nem GST ajemer garitem ayoktsü aser ibaji September 22, 2025 nungi mapa küma tenzüktsü ta metetdaksüogo.

"India sorkari iba otsüsütsü mapa atema kanga pelar. Iba ajanga customers nem jenjang dalang agütsüba dang masü saka auto sector temlung

uludaktsüogo. Benjung mapang tejakdang iba mera agiba ajanga tajangzük angutsü mlar" ta Sales-Service-Used Car Business & Profit Enhancement Vice President Varinder Wadhwa-i tanü ashi.

Toyota Kirloskar Motor (TKM) ya transparent & customer-centric company ka lir aser onoki customers nem tajangzük agütsünür, ta pai ashi.

Potential Price Reductions**on Toyota vehicles:****Reduction in Price**

Glanza : Up to INR 85,300
Taisor : Up to INR 1,11,100
Rumion : Up to INR 48,700
Hyryder : Up to INR 65,400
Crysta : Up to INR 1,80,600
Hycross : Up to INR 1,15,800
Fortuner : Up to INR 3,49,000
Legender : Up to INR 3,34,000
Hilux : Up to INR 2,52,700
Camry : Up to INR 1,01,800
Vellfire : Up to INR 2,78,000

Nepal Ato Kilonser K.P Sharma Oli-i mapa toktsüogo



Kathmandu, Rongjui/September 9 (Agencies):

Hombarbü social media tenokdangba agütsüba ajanga nüburtemi longkak aitba mapang nisung 19 tashi asüba sülen anogo ka lir ochi mashi inyakyim anema longkaka aitertemi mapang telatet ka makai curfew benoker aliba mangai police tem den raratepba mapang ka nung Nepal Ato Kilonser K.P. Sharma Oli-i Mongolbarnü mapa toktsüogo, ta pa nem teyari agütsür kati ashi.

Oli-i aniba sorkari longkak aitba sentong ya azütokshi lendong tulu ka akümba sülen social media atema tenokdangba agütsür aliba agintsü. Hombarnü longkak aitertemi parliament atsüngtsü merangba mapang police temi tear gas aser rubber bullet tem khaloktsüba sülen nisung 19 tepset aser nisung 100 dak tema yirua liasü.

2008 küm longkak aitba sentong tulu ayongzüka monarchy atsüngtokba sülen Nepal ya yimden yimsüsüba aser rongsenketzüng nung timtema arudar, aser tang tensa mejungi kümer aliba ya küm aika tsüngda mepetmesü tamajungtüba asütsü.

"PM-i mapa toktsüogo," ta Oli nem teyari agütsür Prakash Silwal-i Reuters dang ashi. Iba jenjang agiba ajanga linük ano yimden yimsüsüba tsütsü tensa mejungi akümtsü.

Mongolbarnü Oli-i political party tem ajak senden ka ayong aser ashiba agi, azütokshi lendong ya linük tejangraba masü aser tebilemtsütem bentettsü atema yimjung nung sensaksemstüla.

Ajisüaka sorkar anema nüburtem mit adokba tajemba maküm aser ketdangsürtemi mapang telatet ka makai curfew benoker liaka longkak aitertem parliament aser linük yimtiba Kathmandu kübok tesem balala nung adenshia liasü.

Longkak aitertemi lenmang kar nungbo tyre tem ronga toktsü aser riot gear semer aliba police tem dak long agi ona areshia liasü.

India-Nepal arrtsü nung aliba jilatem nungi nüburtem longkak aitertem nem teyari agütsütsü atema Kathmandu-i ao tenzüko, ta longkak aiter kati Reutres dang phone ajanga ashi.

Tenük kuli agütsürtemi ashiba agi, longkak aitertemi Kathmandu nung yimden yimsüsür kar kidang mi senoktsüogo aser local media sangdong balala ajanga ashiba

agi, minister tem karbo military helicopter temi aninogo.

"Onok tarutsü atema onoki maneni nokdaka lir... onoki iba linük ya ochimashi inyakyim nungi pila lidaktsüner, ajita asünungdang nüburtem ajak education, hospital, medical facility tem mela mela agitettsü," ta longkak aiter Robin Sreshtha-i Reuters TV dang ashi.

Longkak aitertemi parnok ya "demonstrations by Gen Z" ta nüngja agütsüogo, koba linük nung tanga yimtitemia prokshiaogo. Sorkari ochi mashi inyakyim azüoktsü aser rongsenketzüng jenjang ajungkettsü atema jenjang tapet magiba ajanga temulung mesüi lanurtemi sorkar anema nokdak tenzüko.

MULUNGZEN O



ASO :
10.11.1968

ASÜ :
05.09.2025

Onoki teti meima aliba ojala **Rongsenpokla** (Longsa), shirang yipden nung aliba mapang nungi la iba akümüli wadang tembangba anogo tashi nung ozü shisabulu aser mangyim nüktzü agi sünger alidang kija, kibong, Arogo aser lokti tentet balala nungi shirnokisa nübu, rongsen, shisatsü aser sarasadem agi onok mulung sünepja yaritepogo, nenok ajak dang kanga pelaba lemsateper.

Ajak dangi tsüngtong arua ozü pelaba mulungnen o melemsateptetba asoshi sasar, ajisüaka asen Teyanglur Tsüngremi nenok taküm aser kibong moajang ta onok tamang sarasadem.

Temeim Kinungbo, Chirnur aser Kinungertem.

MENUNGRA BILEMTETER ASUR MERENTEMJEN



TASÜBA : 10.9.2024

Iba akümüli wadang tempanger teti anisüngzüka limai or küm ka ajungba anogo. Tanü na onok den meliaka ne temeim aser sayu otem onok mulungjang nung teti alir. Onoki na menungra bilemteter.

Temeim Kinungtsü, Chirnur, Semchirtem & Anük Amo.

MENUNGRA BILEMTETER



PONANUNGLA (Akhoya)
15.09.1944 - 10.09.2023

Temeim Ojala, Onüla aser Otsüla onok nungi pilar küm ana rentetakasa lai sarasademtsüba aser la sayu o agi tanü tashi ozü len anidang kanga rongjenseta aser menungra bilemteter.

~ Kinungertem.

MULUNGZEN O



ASO :
28/5/1972

ASÜ :
5/9/2025

Onoki teti meima aliba asür **Talingangchet** (Longkhum), pa shirang yipden nung aliba mapang nungi akümüli tembanga aruba anogo aser asü lepku mapang ozü mangyim nung alidang shirnokisa tamang sarasadem, ali rongsen, shisatsü aser nübu agi yaria aruogo, nenok dang pelaba iba osang kakat ajanga lemsateper.

Metetshi-i melitet nung item arogo aser loktitem dang pelaba lemsateper:-

1. Longkhum Baptist Arogo,
2. Settsü Baptist Arogo,
3. Alichen Baptist Arogo,
4. S.C.Y.S
5. Ao Baptist Arogo Drivertem,
6. Falcon Club,
7. Y.D.B
8. Referral Hospital Doctors & Nurses.

Temeim Kinungtsü, Jala ana aser Kinungertem.

OFFICE OF THE MERANGKONG IMSONG-UNGER KIDONG TELONGJEM KOHIMA TENÜNGSANG AGÜTSÜR

Merangkong Imsong-Unger kidong telongjem, Kohima ajanga Wb.Pangerlemba Imsong aser Wt.Dzuthore (Atula Panger) tena jabaso **Wb.Nungshikaba Imsong**-i N.P.S.C. tatidang nung takok tajung ngua, Secretariat Assistant (P&AR Department) jenjang ajangzüktetba asoshi kidong-i konang tetushi aser tenüngsang agütsür.

Tulusang Tsüngrem-i tarutsü anogotem nung wadang tuluba aser tajungba moajangma.

Kidong tenüng nung,

NUNGSANGMEREN
President

SANEN IMSONG
Secretary



US nung sota alirtem anir arutsü atema S Korea-i tayimtsü ka yoktsü

Seoul, Rongjui/September 9 (Agencies): Taoba hopta US kübok Georgia state nung car battery plant ka meita aoba mapang sota aliba mapa inyaktertem anir arutsü atema South Korea-i temonuba agi Bodhbarnü tashi nungbo tayimtsü ka yoktsü, ta Korean Air otongdari Mongolbarnü ashi.

Tir Lee Jae Myung-i, linük ana tsüngda tesendaktep tajung aliba dak ajemdaker ken o kanga junga bentettsü atema Seoul-i Washington den sensak asemstü ta ashiba den, cabinet senden ka nung pai US nung

sota aliba lisopurtem atema kanga khuret abener ta ashi.

Menden 368 aketba Korean Air Boeing 747-8i tayimtsü South Korea kübok Incheon nungi Atlanta-i aotsü, ta otongdari ashi.

U.S. immigration raid mapang electric garitem atema amenokba Hyundai Motor (005380.KS), aser LG Energy Solution (373220.KS), project nung South Korea nung 300 shi den ano tangar 175 pua liasü.

South Korea Foreign Minister Cho Hyun tang

Washington nung oa parnok atema sensaksemdar. Sensaksem onüktem rongnung kidangi meyipa yokba Korea nungertem ya tanaben United States-i aitsü asoshi temelaba agütsütsü asoshi tenangzüka ka meshidar.

Department of Homeland Security indang investigative operations puti otsü nung tang tesem ka tesashitiba meitaogo aser iba ajanga South Korea nung

kanga aoksadaktsüogo, shirnok U.S Washington den mulungteper aliba shishilebaba tsütsü

tenangzüktepba ka tembanga inyaktsü meranga arua liasü.

Mongolbarnü sangdongba Realmeter opinion poll nung South Korea nung shilem 60 shi-i iba inyakyim agi parnok tezü adangba lemsatepogo aser US ketdangsürtemi tashi alia amshi ta bilemer, saka shilem 30 shi-ibo iba ya mepaitoktetba inyakyim ka ta bilemer.

Sota alirtem rongnung Japan nung ana aser China nung teku densema lir, ta Nikkei business daily sangdong ka ajanga metetdaksü.

Inter KIC U-16 Badminton asayamung tenzükogo



Pfutsero nung September 9 nü 2nd Inter KIC U-16 Badminton Tournament lapokba sentong nung Dr. Neisatuo Mero den asayartem aser ketdangsürtem tangokba noksa nung angur.

Kohima, Rongjui/September 9 (TYO): 2buba Inter Khelo India Centre (KIC) Under-16 Badminton Tournament tanü Multi Purpose Stadium, Pfutsero nung tenzükogo. Iba asayamung ya Department of Youth Resources & Sports, Nagaland tawabangba kübok ayongzüka asayadar.

Asayamung lapokba sentong nung alakteta jaoker ama o jembiba mapang MLA Dr. Neisatuo Mero-i, iba asayamung Pfutsero nung ayongzüka asayaba atema Department of Youth Resources & Sports dang kanga pelaba lemsatapa liasü.

Chief Minister Dr. Neiphiu Rio lenisüba nung asenoki state nung maongkatem aika nguogo, ta ashiba den pai, sorkari saisabong aser lanurtem

lenmang aisü nung nongita arudar, ta shisem.

"Iba teyari ajanga asayartemi state, national aser international jenjang nung medal timba ngudar. Iba ajanga lanurtem nem kodang teyari tapet agütsütir idangji parnoki takok tanung ngutetra ta sayur. Iba ajangasa asen lanurtem dak sempet aika aliba aser takok angutsü atema tashi aliba sayur," ta Dr. Mero-i ashi.

Maneni pai asayamung nung shilem agirtem dang ochishia, kati ka akümtsübutepa aser jangradem asayatsü ajungshi.

Takok ya mela mela marur ta shia pai, takok ya meranga inyakba ajanga nguteter ta ashi.

Takok angutsü atema tongtibang inyakyim kaji tanen makai inyakba ya lir. Asaya nung süang mesüra taküm nung

tanga lenla balala nung süang tanen makai inyakba ajanga renlok aotsü teyari agütsür, ta Dr. Mero-i ashi.

Taküm iba asayamung nung KICs Phek, Niuland, Wokha, Mokochung, Zunheboto, Athibung (Peren), Mon, Kiphire aser Longleng nungi asayar 82-i tebur aser tetsür kija aser tarep asaya nung asayadar.

Asayamung lapokba sentong ya Director, Youth Resources & Sports Kethosituo Sekhose lenisüba nung agi aser Rev. Dr. Kiizhopoyo Tunyi-i Tsüngrem temaotsü meshizüka sarasadema liasü.

Sentong nungsa Additional Director, Youth Resources & Sports Megolhu Dolie-i tepela o jembiba liasü. Iba asayamung ya September 10 nü tembangtsü.

Onana-i loan nung Trabzonspor-i aotsü mulunga agizükogo

Rongjui/September 9, 2025

(Agencies): Manchester United goalkeeper Andre Onana-i Turkey club Trabzonspor-i loan nung oa asayatsü mulunga agizükogo.

Inyakyim tembanga minyak, saka asayar den kanga junga sendaktepa aliba source kati ashiba agi, pa September 14 nü Fenerbahce den asayatetsüsa mapang shitak nung tenangzüktepba yanglutsü imlar.

Turkey indang transfer window ya Hokolbarnü tashi lapoktsü aser iba ajanga Onana nem tenangzüktepba yanglutsü asoshi mapang peria agütsüogo, shiba tang Cameroon team nungi asayadar.


Onana ya Turkey indang club Galatasaray den sendaktepa liasü, saka parnoki Ugurcan Cakir alizüktsü telemtetba agia liasü.

Cakir, shiba Brehostibarnü World Cup qualifying nung Georgia akokba Turkey team nungi asaya liasü, pa Trabzonspor nungi iba club nung September 2 nü denogo. Pa atema euro million 36 agüja liasü.

Iba tenangzüktepba yangluba sülen Trabzonspor pur Cakir melentsü pur ka bushia liasü aser Onana-i temelenshi bener arutsütsü ta amanger.

United-i Royal Antwerp nungi Senne Lammens alizükba sülen Onana mesüra Altay Bayindir yoktsü sentong liasü.

Old Trafford ketdangsürtemi team nung goalkeeper pezü densema senior squad ka ayutsü mulunga lir ta shiogo, ajisüaka Europe nung asayamung nung



Andre Onana

asayatsü mali asünung coach Ruben Amorim-i squad tilaba aginer.

United nung Tom Heaton ya senior goalkeeper pezübuba lir.

Onana ya taoba season United indang number one goalkeeper ama pa mapang tembanger liasü, ajisüaka pa Tottenham makokba Europa League final nunbo tetenzük nungi asaya liasü.

Pre-season training nung pa hamstring yiruba sülen pa United pur warm-up game ajak nung danga masaya, aser Premier League tenzükba sülen asaya asemprongla nung masayadaksüi liasü.

Taoba ita EFL Cup nung League Two club Grimsby pur tanabuba round nung makokba asaya nung Onana asaya, saka tanabuba goal yabo pai aibelenba ajanga ia liasü.

Arishi küm 29 tain asayar ya Erik ten Hag coach asüba mapang Inter Milan nungi 2023 küm pound million 47.2 agi alizüka liasü. Ajisüaka pai imlaba ama masayatet aser pai aibelenba ajanga club asaya aika tamakok ngua liasü.

Hong Kong Open: Satwik aser Chirag na tanabuba round-i iogo



Rongjui/September 9, 2025

(Agencies): India nunger nüngtugu tebur tarep asayar Satwiksairaj Rankireddy aser Chirag Shetty nati Mongolbarnü Hong Kong Open Super 500 tournament nung mezüngbuba round kokogo,

Kasa anogo India nunger asayar Kiran George tebur kija asaya main draw atema qualify sütetogo.

Taoba ita-ang Paris nung World Championships nung bronze medal anguba sülen Satwik aser Chirag nati Hong Kong Open mezüngbuba round nung Taiwan nunger tarep Chiu Hsiang Chieh aser Wang Chi-Lin with na of 21-13, 18-21, 21-

10 agi koka liasü.

Taoba mapang world number one tarep yagi mezüngbuba asaya nung kanga junga asaya, tanabuba game makok saka tasembuba game amokbanger asaya-a iba asaya koka liasü.

India nunger tarep ya taruba asaya Japan nunger Kenya Mitsuhashi/Hiroki Okamura na mesüra Thailand nunger Peeratchai Sukphun/Pakkapon Teeratsakul na den asayatsü.

Tebur kija asaya qualifying round, nung Kiran-i asaya ana atonga koka main draw-i iogo. Pai mezüngbuba asaya nung Malaysia nunger asayar Cheam June Wei akok aser iba sülen

külem India nunger S Sankar Muthusamy Subramanian koka liasü.

Sankar-ia mezüngbuba asaya nungbo England nunger asayar Wang Yue Hang koker liasü. World number 38 Kiran ya Singapore nunger asayar Jia Heng Jason Teh den asayatsü.

Kasa asayamung nung Tharun Mannepli-i qualifying round nung taoba mapang world number one asayar Kidambi Srikanth 28-26, 21-13 agi koka liasü.

Ajisüaka tanabuba asaya nung Mannepli-i, Malaysia nunger fourth seed asayar Justin Hoh, 21-23, 13-21, 18-21 agi makok.

INDIA OSANG :

Tapak 3 nungi...

Indo-Nepal arrtsü nung security ...

Longkak aitertemi Tir Ramchandra Paudel densema yimden yimsüsürtem ki amak aser parliament raksaja liasü.

Nepal sorkari social media website tem nokdangbabo yasüing aginogo, saka longkak aitertemi ochi mashi inyakyim anema aser police-i longkak aitertem anema jenang agiba mapang tepsetba parnok 19 atema ochi obendang khanga maneni longkak aitar.

Kasa mapang nung Nepal sorkari WhatsApp, Facebook aser Messenger amala social media sabangtem nokdangba ajanga linük ana tsüngda arrtsü adena tongtepratep nung tetsükdaksü adoka liasü.

Artsü nung alirtem, shirnoki Nepal nung kinungertem den sendakteptsü atema internet amshir, parnoki ashiba agi, tenokdangba agütsüba ajanga tetsükdaksü ajangshir. Ranipur nung alir advocate Gyas Ahmed-i ashiba agi, India aser Nepal na alemli nungi loktiliba aser sobaliba tesendaktep tajung lir.

"Nepal nung onok kinungertem aika lir. Internet ajanga onok sendaktepa aruogo. Tenokdangba agütsüba ajanga onok atema tetsükdaksü adok aser mepetmesü tulu adoker aliba mapang osang magiteti onok shisabulu tali kümdaksüogo," ta pai ashi.

BILEMDANGANG

"Tensa ajak nung na pela litetra na temaotsüba."